



**"ТАСДИҚЛАЙМАН"**

**Тошкент шаҳридаги "МЭИ" миллий тадқиқот университети" филиали**  
**ижроочи директори**

**Х.С.Далиев**

**2025 й.**

**ТОШКЕНТ ШАҲРИДАГИ "МЭИ" МИЛЛИЙ ТАДҚИҚОТ  
УНИВЕРСИТЕТИ" ФЕДЕРАЛ ДАВЛАТ БЮДЖЕТИ ОЛИЙ ТАЪЛИМ  
МУАССАСАСИ ФИЛИАЛИ  
"ТАЛАБАЛАР ТУРАР ЖОЙИ"  
НИЗОМИ**

**I. Умумий қоидалар**

**1.** Тошкент шаҳридаги "МЭИ" миллий тадқиқот университети" Федерал давлат бюджети олий таълим муассасаси филиали (кейинги ўринларда - филиал деб юритилади)нинг "Талабалар турар жойи (кейинги ўринларда - турар жойи деб юритилади) тўғрисида"ги Низом ҳамда Олий ва ўрта махсус таълим вазирининг 2019 йил 1 ноябрдаги "Талаба (ўқувчи)лар турар жойи фаолиятига оид намунавий ҳужжатларни тасдиқлаш тўғрисида"ги 1019-сон буйруғининг 1-илоvasи асосида ишлаб чиқилди.

**2.** Филиалга узоқ шаҳар ва вилоятлардан келиб таълим олаётган талабаларни вақтинча яшаш жойи билан таъминлаш мақсадида "Талабалар турар жойи" ташкил этилади.

**3.** Талабалар турар жойи бошқаруви-мазкур Низом асосида филиал раҳбарияти томонидан шакллантирилади ҳамда ўз фаолияти йўналишига, иш режаси ва дастурига, махсус муҳрига, штат бирлигига эга бўлиб, талабалар уйининг маъмурий, хўжалик, маънавий-ахлоқий тарбия ишларини бошқаради.

**4.** Талабалар турар жойида талабаларнинг яшаши, ўз устида мустақил ишлаши, дам олиши ҳамда спорт, санъат ва бошқа клубларда қатнашиши учун шароитлар яратилади.

**5.** Талабалар турар жойининг моддий-техник таъминоти, уни капитал ва жорий таъмирлаш, бинодаги қаттиқ ва юмшоқ кроват, мебел, хона жихозлари (кўрпатўшак, ёпинчиклар, сочиқлар ва бошқалар), техника воситаларини сақлаш, таъмирлаш, худудни ободонлаштириш, тозалигини таъминлаш, коммунал-хўжалик хизматлари (иссиқ ва совуқ сув таъминоти, канализация, иссиқ сув қувурларини таъмирлаш) ва бошқа шарт-шароитлар филиал томонидан таъминланади.

**6.** Талабалар турар жойи олиш учун Ёшлар масалалари ва маънавий-маърифий ишлар бўйича директорнинг биринчи ўринбосари номига ариза ёзади ва унга паспорт нусхасини илова қилади. Мазкур ариза ўрнатилган тартибда кўриб чиқилгач, талабалар турар жойига жойлаштириш бўйича

Ёшлар масалалари ва маънавий-маърифий ишлар бўйича директорнинг биринчи ўринбосари рухсати билан берилган ордер асосида амалга оширилади.

7. Тарбиявий-маданий, спорт-соғломлаштириш ишлари ва талабалар турар жойида яшовчиларга маиший хизмат кўрсатишни ташкил этиш борасидаги умумий раҳбарлик филиал ижрочи директори зиммасига юклатилади.

8. Талабалар турар жойига ўқув муассасаси ишчи-хизматчилари, бегоналар, талабаларнинг оила аъзоларини жойлаштириш қатъиян ман этилади.

9. Талабалар турар жойида яшаш учун талабалар томонидан тўланадиган тўлов миқдори ҳар ўқув йили бошида Филиал Кенгашининг тегишли қарори билан белгиланади. Турар жойида яшаганлик учун тўловларни амалга ошириш муддатлари шартномада белгиланади. Талабаларнинг ёзги таътил даври учун тўлов амалга оширилмайди.

10. Талабалар турар жойида яшаганлик учун белгиланган тўловларни амалга оширишда филиалнинг қуйидаги тоифадаги талабаларига имтиёзлар Филиал Кенгаши томонидан берилиши мумкин: кўз касалликлари бўйича 1-2-гурӯх ногиронлари, чин етим ва етим (ота-оналаридан бири вафот этган), Меҳрибонлик уйи тарбияланувчи, ижтимоий ҳимоя ягона реестрида рўйхатда турган талабаларни тўловдан озод этилади.

## **II. Талабалар турар жойида яшовчиларнинг ҳуқуқ ва мажбуриятлари**

11. Талабалар турар жойида яшовчиларнинг ҳуқуқлари қуйидагилардан иборат:

- ўзига ажратилган хонада ўрнатилган ички тартиб-қоидаларга риоя қилган ҳолда яшаш;

- талабалар турар жойи биноларидаги маданий-маиший жиҳозлардан фойдаланиш;

- фойдаланиш учун яроқсиз ҳолга келган жиҳоз, мебел ва бошқа мулкъларни таъмирлаш, янгилаш ҳамда маиший хизматлардан фойдаланишда юзага келган камчиликларни бартараф этишни сўраб раҳбариятга мурожаат қилиш;

- талабалар турар жойида ўтказиладиган оммавий маданий, спорт ва тарбиявий тадбирларда иштирок этиш;

- яратилган шарт-шароитлар бўйича филиал маъмуриятига таклифлар билан чиқиш;

- "Талабалар кенгаши"нинг аъзоларини сайлаш ва унга сайланиш;

- "Талабалар кенгаши" орқали талабалар турар жойининг маиший таъминотини такомиллаштириш, тарбиявий ишлар ва маданий хордиқни ташкил этиш, яшаш хоналарини жиҳозлаш бўйича масалаларни ҳал этишда иштирок этиш.

**12. Талабалар турар жойида яшовчиларга қуйидаги мажбуриятлар юкланади:**

- ички тартиб-қоидаларга қатъий амал қилиш;
- маъмурият билан тузилган ўзаро масъулият тўғрисидаги шартнома қоидаларига риоя қилиш;
- навбатчилик жадвалига биноан хоналарда, қават ва кириш жойларида навбатчилик қилиш, дам олиш жойларида намунали тозаликни таъминлаш;
- электр асбобларидан унумли фойдаланиш ва техника хавфсизлиги қоидаларига риоя қилиш;
- яшаб турган хона ва умумий фойдаланиш жойларини ҳар доим саранжом тутиш;
- хонадошлар ҳамда талабалар турар жойида яшаётган талабалар билан самимий ва ахил муносабатда бўлиш;
- қават ва сексия сардорлари, талабалар кенгаши раиси топшириқларини бажариш;
- талабалар турар жойи ва хонадаги мавжуд ҳамма жихозларни (шифонер, кроват, тумбочка, стол, стул ва х.к.) намунали даражада тутиш;
- талабалар турар жойи ва хонадаги мебелларни, дераза ва унга қўйилган ойналарни синдирмаслик, эшик қулфларини талабалар турар жойи мудирининг рухсатсиз алмаштирмаслик;
- умумий фойдаланиш жойларига ўрнатилган ёритгичлар, электр ва электр плиталарини эҳтиёт қилиш, ювиниш хонаси, ошхона, ҳожатхона ҳамда маънавият ва маърифат хоналари жихозларидан тўғри фойдаланиш;
- электр ва электр плиталаридан тежаб фойдаланиш, қўлбола электр иситгич асбобларидан фойдаланмаслик;
- жадвал бўйича навбатчилик қилиш, белгиланган муддатда қаватни ҳамда умумий фойдаланиш жойларини (ҳожатхона, ювиниш хоналари, овқат пишириш хонаси ва бошқалар) тозалаш, маиший чиқиндиларни махсус белгиланган жойларга ўз вақтида чиқариб ташлаш;
- талабалар турар жойида ўтказиладиган хашар, кўкаламзорлаштириш ва ободонлаштириш ишларида мунтазам, фаол қатнашиш;
- талабалар турар жойидан узоқ муддатга кетишдан олдин (ёзги ва қишки таътилга, дам олишга, амалиётга, даволанишга) хонадаги жиҳозлар ва хона калитини талабалар турар жойи бошқаруви раиси (мудир)га топшириш;
- битирув малакавий ишларини тугаллагандан сўнг ёки филиалдан четлаштириш тўғрисида буйруқ чиқарилган тақдирда хона ва ундаги жиҳозларни бир ҳафта муддат ичида талабалар турар жойи бошқаруви раисига топшириш.

**13. Талабалар турар жойида яшовчиларга қуйидагилар ман этилади:**

- талабалар турар жойи бошқарув раисининг рухсатсиз бир хонадан иккинчи хонага кўчиб ўтиш;
- яшаш хонасида кир ювиш;
- хонадаги анжомларни бошқа хонага рухсатсиз кўчириш;

- хонадаги электр тармоқларини ўз хохишича ўзгартириш ва қўшимча ёритгич ўрнатиш;
- деворларга турли расмлар чизиш, хар хил қоғозлар ёпиштириш;
- овоз чиқарувчи қурилмалар овозини хона ташқарисидан юқори эшитилиши, юқори овозда ашула айтиш ва мусиқа асбобларини чалиш;
- электр иситгичлар ва керосиндан фойдаланиб ишлайдиган асбобларни ишлатиш;
- бегона одамга тунаб қолиш учун жой бериш;
- туғилган кунларни нишонлаш;
- спиртли ичимликлар, тамаки маҳсулотлар (сигарет), гиёҳванд ва психотроп моддаларни истеъмол қилиш, сақлаш, сотиш тақиқланади.
- хар қандай қимор ўйинларини ўйнаш, диний тадбирлар, намозхоналар ташкил этиш тақиқланади.
- Талабалар турар жойида яшовчилар кечки соат 22:00дан кейин кечкиб келганда, турар жойга киритилмайди.

**14.** Талабалар турар жойи хаётида фаол иштирок этаётган, намунавий хулқли талабалар қуйидаги тартибда рағбатлантириладилар:

- миннатдорчилик билдирилади;
- мақтов ёрлиғи;
- эсдалик совғалари билан тақдирланади;
- моддий рағбатлантирилади.

**15.** Талабалар турар жойи ички тартиб-қоидаларини бузганларга нисбатан қуйидаги чоралар қўлланилади:

- огохлантирилади;
- талабанинг ота-онаси билан суҳбат ўтказилади;
- хайфсан эълон қилинади;
- талабалар турар жойидан чиқарилади;
- филиал ижрочи директориға талабалар сафидан чиқариш бўйича таклиф киритилади;
- талабалар ўз турар жойларида фойдаланиб келаётган мол-мулкка бевосита етказилган ҳақиқий зарарни, агар зарар уни бартараф этиш мумкин бўлмаган кучлар, нореал хўжалик таваккалчилиги оқибатида, охирги зарурат ёки зарурий мудофаа натижасида келиб чиққан бўлмаса тўлаши шарт.

### **III. Филиал маъмуриятининг мажбуриятлари**

**16.** Филиал директор ўринбосарлари, Ишлар бошқармаси бошлиғи, декан ва комендант талабалар турар жойи тозалиғи, санитария ҳолати, талабалар турар жойида яшовчиларнинг дахлсизлиғи ва тарбиявий ишлар самарадорлиғи учун масъулдирлар.

**17.** Филиал маъмуриятининг мажбуриятлари:

- талабалар турар жойида санитария ва гигиена қоидаларига риоя этилишини таъминлаш;

- талабалар турар жойини тегишли чойшаб, ёстик жилдлари ва бошқа зарур анжомлар билан таъминлаш;
- талабалар турар жойида ўтказиладиган тадбирлар, маданий-оммавий ишлар ҳамда спорт мусобақаларини ўтказишни таъминлаш;
- талабалар турар жойини жорий таъмирлаш ишларини амалга ошириш;
- талабалар турар жойида яшаш шароитларини тегишли меъёрлар асосида жихозлар билан таъминлаш;
- талабалар турар жойида фаолият юритувчи шахсларни зарурий иш ўринлари билан таъминлаш;
- талабалар турар жойида юзага келган маиший хизмат тизимидаги камчиликлами ўз вақтида бартараф этиш ва қайта туғилмаслигининг олдини олишдан иборат.

**18.** Филиал маъмурияти талабалар турар жойига алоҳида масъул этиб Бошқарув раисини тайинлайди.

#### **IV. Талабалар турар жойи фаолиятини ва бошқарувини ташкил этиш**

**19.** Талабалар турар жойининг ўрнатилган меъёрий талаблар асосида фаолият юритиши учун шахсан ижрочи директор масъулдир.

**20.** Талабалар турар жойида ўқув хонаси, маънавият ва маърифат хонаси, дам олиш (ота-оналар) хонаси, гигиена хонаси, тарбиячилар хонаси, ошхона, хожатхона, ювиниш хонаси, душ ташкил этилиши лозим.

Талабалар турар жойида АРМ филиали ташкил этилади ва режа асосида ўз фаолиятини олиб боради.

**21.** Талабалар турар жойидаги ошхоналар электр плиталари, стол-стул, сув тармоғи, санитария жихозлари билан таъминланиши ҳамда ёнғин хавфсизлиги талабларига тўлиқ жавоб бериши шарт.

**22.** Талабалар турар жойидан фойдаланиш, меъёрий-ахлоқий тартибларга риоя қилинишини таъминлаш, талабаларга қулай шароитни яратиш мақсадида талабалар турар жойи Бошқаруви ташкил этилади. Бошқарув таркиби ва хизмат кўрсатувчи ходимлар Филиал штат бирликлари доирасида шакллантирилади. Намунавий штат бирлигида кўзда тутилмаган ходимлар жамоатчилик асосида ишга жалб этилади. Унинг таркиби қуйидагилардан иборат бўлади:

- бошлиқ (мудир);
- хўжалик ишлари бўйича мудир муовини - (Бошлиқ ўринбосари);
- Талабалар Кенгаши раиси (Бошлиқ ўринбосари);
- педагог-тарбиячилар ва бошқалар.

Талабалар турар жойи Бошқарувини ташкил этиш, олиб борилаётган ишларни мувофиқлаштириш ва назорат қилиш масъулияти ижрочи директор зиммасига юклатилади.

**23.** Талабалар турар жойи бошқарувининг штатлар бирлигини таъминлаш, иш ҳақини белгилаш, ходимларни ишга жалб этиш, улар

томонидан ўз хизмат вазифаларининг бажарилишини назорат қилиш, талабалар учун зарур шарт-шароитларни яратиб бериш ва ижтимоий химоя қилиш ҳамда истиқомат қилувчи талабалар ўртасида ташкилий, Директор ўринбосарлари ва Ишлар бошқармаси томонидан амалга оширилади.

**24.** Талабалар турар жойи бошқаруви таркибидаги барча ходимлар ижрочи директор томонидан тайинланади. Бошқарувнинг йиллик иш режаси Филиалнинг Илмий кенгаш томонидан тасдиқланади ва ҳар ярим йилда ўз фаолияти бўйича Илмий кенгашга ҳисобот беради.

**Еслатма:** *Талабалар турар жойи жойлашиши яқин бўлиб, уларда яшовчилар сони бир минг ва ундан ортиқ бўлса "Талабалар шаҳарчаси" дирексијаси ташкил этилиши мумкин. Унинг фаолијати таълим муассасасига ажратилган маблағлар ва бюджетдан ташқари маблағлар ҳисобидан қопланади.*

## **V. Талабалар турар жойи бошқаруви раисининг вазифалари**

**25.** Бошқарув раиси-талабалар турар жойи фаолиятини ташкил этишнинг барча йўналишлари бўйича умумий раҳбарликни олиб боради.

**26.** Бошқарув раиси лавозимига тайинланадиган шахс тажрибали бўлиши шарт. Унинг вазифалари қуйидагилардан иборат:

- талабалар турар жойининг фаолиятини ташкил этиш дастури ва режасини ишлаб чиқади;

- фаолияти бўйича ҳар ярим йилда Филиал Илмий кенгашида ҳисобот беради;

- талабалар турар жойи бошқарувидаги лавозимларга штат бирликлари асосида ходимлар ва ишчиларни танлайди, ишга қабул қилиш ва ишдан озод этиш бўйича ўз тавсияларини раҳбариятга расмийлаштириш учун тақдим этади;

- талабани хоналарга жойлаштиради;

- санитария меёрларининг бажарилишини таъминлайди;

- ўринларни талабанинг жинси, бўйича тақсимотини белгилайди, улар ҳақидаги умумий маълумотлар банки, ахборотлар, статистик жадвалларни тайёрлайди, ушбу маълумотлар билан филиал раҳбарларини доимо хабардор этиб туради;

- талабалар турар жойининг моддий-техник таъминотини таҳлил этади, эҳтиёж ва талаблар асосида зарур материаллар, жихозлар учун буюртмалар беради;

- талабаларнинг яшаши, дарс тайёрлаши ва дам олишлари учун зарур шарт-шароитлар яратади;

- паспорт тизими, талабалар турар жойига кириб-чиқиш қоидаларининг қатъий бажарилишини таъминлайди;

- педагог-тарбиячилар фаолиятини ташкил этади;

- доимий навбатчиликнинг узлуксизлигини таъминлайди;

- назоратчилар гуруҳи фаолиятини ташкиллаштиради ҳамда "Маҳалла профилактика инспекторлари" билан ҳамкорликда ишлашни таъминлайди;
- талабалар бўш вақтини фойдали меҳнат билан тўлдиришни амалга оширади.

## **VI. Хўжалик ишлари бўйича мудирнинг вазифалари**

27. Хўжалик ишлари бўйича мудир фаолиятини бевосита бошқарув раиси йўналтиради, мувофиқлаштиради ва назорат қилади.

28. Хўжалик ишлари бўйича мудир лавозимига тайинланадиган шахс олий маълумотли ва камида 3 йиллик иш стажига эга бўлиши лозим.

29. Унинг вазифалари қуйидагилардан иборат:

- талабалар турар жойи ва унинг ҳудудидаги хўжалик ишларини олиб боради;
- талабаларни зарур бўлган қаттиқ ва юмшоқ мебеллар, хона жихозлари, ювиниш воситалари билан таъминлайди;
- мавжуд хўжалик муаммолари ва камчиликларни бошқарув раиси (мудир) билан биргаликда бартараф этади;
- хоналарни, ўқув хонасини зарур жихозлар ва воситалар билан таъминлаб туради;
- талабалар турар жойи ҳудудини ободонлаштириш, кўкаламзорлаштириш, санитария ишларини амалга оширади;
- талабалар турар жойининг совуқ ва иссиқ сув, ва электр энергияси билан таъминланишини назорат қилади, юзага келган муаммолар бўйича тегишли ташкилотлари билан боғланади, камчиликларни бартараф этади;
- хона жихозлари (чойшаблар, ёстиқ жилди, кўрпа-тўшак, сочиклар)ни даврий равишда алмаштирилишини амалга оширади;
- тегишли ҳудуддаги экология, атроф-муҳит тозалиги, дарахтларни парваришлаш, кўкаламзорлаштириш ишларини олиб боради;
- тегишли ҳудуддаги электр тармоқлари, ёритгичлар ишлашини таъминлайди;
- хавфсизлик ва ёнғин хавфсизлигига оид ишларни амалга оширади;
- санитар хоналар (гигиена хонаси, душ, хожатхона) фаолиятини назорат қилади;
- хўжалик соҳасида хизмат қилувчи техник ходимлар - фаррош, вахтёр, электрик, сантехник, боғбон ва бошқаларнинг фаолиятини ташкил этади, назорат қилади.

## **VII. Ҷамоатчилик асосида жалб этилаётган педагог-тарбиячи фаолиятини ташкил этиш**

30. Педагог-тарбиячи филиал ижрочи директор буйруғи асосида талабалар турар жойи бошқарувига жалб этилади.

31. Педагог-тарбиячи вазифасига жалб этиладиган шахс олий педагогик маълумотли ва камида 5 йиллик иш стажига эга бўлиши лозим.

**32.** Педагог-тарбиячи маънавий-ахлоқий тарбия самарадорлиги учун масъулдир. Педагог-тарбиячиларнинг иш вақти смена асосида ташкил этилади.

**33.** Педагог-тарбиячиларнинг иш режаси ва дастурини Ёшлар масалалари ва маънавий-маърифий ишлар бўйича директорнинг биринчи ўринбосари тасдиқлайди ва уларнинг фаолиятини мувофиқлаштиради, йўналтиради ҳамда бошқаради.

**34.** Педагог-тарбиячилар ўз фаолиятини "Талабалар турар жойи педагог-тарбиячиларининг ҳуқуқий мақоми ва қоидалари" тўғрисидаги ҳужжат асосида амалга оширади.

**35.** Педагог-тарбиячининг вазифалари:

- талабаларнинг бўш вақтларида талабалар онги ва қалбига миллий истиқлол ғоясини сингдириш бўйича долзарб маънавий, ҳуқуқий, ахлоқий мавзулар бўйича давра суҳбатлари, тренинглар ва бошқа турли тадбирларни ташкил этади;

- талабалар учун спорт-соғломлаштириш сексиялари фаолиятини ташкил қилади;

- социологик-психологик сўровлар ўтказади;

- ижтимоий-ахлоқий муҳитни назорат қилади;

- талабаларнинг ўзини-ўзи бошқариш жараёнини ташкил этади, уларнинг ишини мувофиқлаштиради ва бошқаради;

- миллий, умумбашарий қадриятларни тарғиб этади;

- спорт (фудбол, баскетбол, шахмат, шашка, стол тенниси ва бошқа) турлари бўйича мусобақалар ташкил этади;

- ижтимоий ҳимояга мухтож талабаларга моддий ёрдамлар бериш бўйича раҳбариятга таклифлар киритади.

## **VIII. Талабалар турар жойида талабаларнинг ўзини-ўзи бошқарувини ташкил этиш**

**36.** Талабалар турар жойида талабаларнинг ўзини-ўзи бошқарувини шакллантириш ва амалга ошириш мақсадида "Талабалар кенгаши" (кейинги ўринларда "Кенгаш") ташкил этилади.

**37.** Кенгаш таркиби умумий овоз бериш орқали, талабалар томонидан сайланади. Талабалар бошқаруви аъзолари "яхши" ва "аъло" баҳоларга ўқийдиган, талабалар ҳаётини ҳар томонлама яхши биладиган, мустақил фикрловчи ҳамда жамоат ишларида фаол иштирок этувчи шахслар бўлиши лозим.

**38.** Талабаларнинг ўзини-ўзи бошқаруви демократик асосларга қурилади. Кенгашнинг фаолиятини йўналтириш, мувофиқлаштириш ишларини педагог тарбиячилар амалга оширади.

**39.** Кенгаш раиси бир йил муддатга сайланади.

**40.** Кенгашнинг иш режаси ва дастури кенгаш раиси томонидан ишлаб чиқилиб, бошқарув аъзолари, педагог-тарбиячилар билан муҳокама қилинади ҳамда ўрнатилган тартибда ижрочи директор томонидан тасдиқланади.

**41.** Хар бир бўлинма ва қаватда сардорлар сайланади. Сардорлар яшовчиларнинг хона(сексия)даги мулкни, тозалик ва тартиб-интизомни сақлашини назорат қилади. Сардорлар Кенгаш қарорларига асосланган ҳолда фаолият олиб боради.

**42.** Кенгаш ўз фаолиятини "Талабалар кенгаши" ҳақидаги Низом асосида ташкил этади ва олиб боради.

**43.** Қуйидаги масалалар Кенгаш билан келишилган ҳолда ҳал этилади:

- маъмурият томонидан яшовчининг бир хонадан иккинчи хонага кўчирилиши;

- яшовчиларни рағбатлантириш ёки интизомий чоралар кўриш.

**44.** Филиалда "Талабалар шаҳарчаси" (дирексияси) ташкил этилган ҳолларда "Талабалар бирлашган кенгаши" ташкил этилиши мумкин. Мазкур кенгаш бир нечта талабалар турар жойлари кенгашларини ўзида бирлаштиради ва уларнинг фаолиятини мувофиқлаштиради.

### **IX. Талабалар турар жойларида тарбиявий ишлар**

**45.** Талабалар турар жойида тарбиявий ишлар филиал фаолиятининг устувор таркибий қисми саналиб, ижрочи директор раҳбарлигида тегишли бўлимлар, жамоат ташкилотлари ҳамкорлигида амалга оширилади.

**46.** Талабалар турар жойида тарбиявий ишларни амалга оширишда шахсан Ёшлар масалалари ва маънавий-маърифий ишлар бўйича директорнинг биринчи ўринбосари масъул саналади. У талабалар турар жойи маъмурияти, деканат, кафедралар ҳамда профессор-ўқитувчилар таркиби ва касаба уюшмаси билан ҳамкорликда тарбиявий ишларни бошқаради.

**47.** Талабалар турар жойида амалга ошириладиган тарбиявий ишлар филиалнинг махсус ишлаб чиқилган режаси асосида турли давлат ва жамоат ташкилотларини жалб қилган ҳолда олиб борилади.

Талабалар турар жойларида бадий ва техник ижодий хаваскор тўғараклар, спорт ва қизиқишлар бўйича клублар, шунингдек, фан, санъат, адабиёт намоёндалари билан учрашувлар, депутатлар, тематик кечалар ва байрам тадбирлари ташкил этилади.

### **X. Талабалар турар жойида яшовчиларга кўрсатиладиган хизматлар**

**48.** Талабалар турар жойида вақтинча фойдаланилмай турган хоналарда ўрнатилган тартибда турли хил (пуллик) хизматлари ташкил этилиши мумкин.

**49.** Талабалар турар жойида қуйидаги хоналар фаолияти йўлга қўйилади:

- маънавият ва маърифат хонаси;
- ўқув ва дарс тайёрлаш хонаси;
- кутубхона;
- дам олиш хонаси (ота-оналар хонаси);
- гигиена хонаси;
- ювиниш хонаси;
- буюмларни сақлаш хонаси;

- ошхона;
- тиббий ёрдам кўрсатиш хонаси;
- спорт зали ва бошқалар.

## **XI. Талабалар турар жойида тиббий ёрдам кўрсатиш**

**50.** Талабалар турар жойидаги тиббиёт хонасига зарур тиббий жихозлар ва биринчи ёрадам кўрсатиш учун керакли бўлган дори воситаларини филиалга ажратилган маблағ, бюджет, бюджетдан ташқари (тўлов-контракт) тушадиган маблағлар ҳисобидан таъминлаш.

**51.** Талабалар турар жойида бахтсиз ҳодисалар рўй берганда, шикастланганда ёки тўсатдан касал бўлиб қолганда дар ҳол турар жой мудирига хабар бериш ҳамда тез тиббий ёрдамга қўнғироқ қилиш.

## **XII. Талабалар турар жойи ҳолатини назорат қилиш**

**52.** Талабалар турар жойи ҳолати филиал раҳбарияти ва жамоат ташкилотлари томонидан махсус режа асосида ўрганиб борилади ҳамда унинг натижалари Илмий кенгашларда муҳокама этилади.

**53.** Талабалар турар жойи фаолияти филиалнинг тегишли Директор ўринбосарлари ва Ишлар бошқармаси томонидан доимий назорат этиб борилади ва ўз йўналиши бўйича вазифаларни амалга ошириш юзасидан ижрочи директорга таклифлар киритади.

**54.** Талабалар турар жойида билдирилган мулоҳаза ва фикрларини ёзиш учун қайднома дафтари (1 нусха, муҳрланган) бўлиши лозим.

**55.** Талабалар турар жойида "Адолат қутиси" ташкил этилади ва яшовчилар томонидан билдирилган фикр-мулоҳазалар ҳар ҳафтада бир марта ўрганилиб, муҳокама қилинади ҳамда тегишли чора-тадбирлар амалга оширилади.

## **XII. Талабалар турар жойларини молиялаштириш**

**56.** Талабалар турар жойи филиалга ажратилган маблағ, бюджет, бюджетдан ташқари (тўлов-контракт) тушадиган, тадбиркорлик асосида ишлаб топилган талабалар истиқомат қилишлари учун тўланадиган маблағлар ҳисобидан молиялаштирилади.

**57.** Талабалар турар жойи штат бирликлари амалдаги филиалнинг штат бирликлари асосида белгиланади.

## **XIII. Низомга ўзгартириш, қўшимчалар киритиш ва бекор қилиш**

**58.** Ушбу Низомга ўзгартириш ва қўшимчалар киритиш, шунингдек кучини йўқотган деб топиш қонун ҳужжатларида белгиланган тартибда амалга оширилади.